



16. april 2019

UPA 2019/134

Naqqiut

Siunnersuut imm.134. 17. januar 2019-meersoq taarserpaa
(Siunnersuuteqartup atia allanngorpoq)

Inatsisartut Suleriaasianni § 33 naapertorlugu aalajangiiffigisassatut siunnersuut manna saqqummi-uppara:

Umiarsuarmik ilaasartaammik sinersortaammik Nanortalimmiit Upernavimmut angalasoqarsinnaasunngorlugu 2020-miit ataatsimik umiarsualiisoqaqqinnissaanik sulissuteqaqqullugit Naalakkersuisut peqqunneqarnissaanik Inatsisartut aalajangiiffigisassaattut siunnersuut.
(Inatsisartunut ilaasortaq Aqqalu C. Jerimiassen, Atassut)

Tungavilersuut:

Timmisartunut bilitsit akisuallaarneri pissutigalugit, imaatigut umiarsuarmik angalasinnaanermut annerusumik periarfissaqarnissaa innuttaasunit ugartorneqartarpoq. Minnerunngitsumik aasaanerani nunatta avannaani kujataanilu taamatut periarfissaqarnerunissaq ugartorneqartarpoq.

Ullumikkut pissutsit imaapput Sarfaq Ittuup angalanissamut pilersaarutai allanngortinneqarsinnaasaratik, angalanissanut pilersaarutaa ilaasoqarsinnaasuseq pitsaanerpaamik atorniarlugu ilusilersorneqarsimasarmat. Innuttaasulli akornanni timmisartornissamut sanilliullugu sinersortaammut ilaannaq orniginartinneqarnerusarpoq timmisartumut bilitsit akisunerujussui pissutigalugit, taamatullu taamatut sinersorluni angalaneq takornarnianit ornigineqartarluni, taatummi angalanikkut nunatsinni pinngortitaq qanimut misigineqarsinnaasarmat, immaqalu aqputaani uumasut, soorlu arferit, alutorsaaticigineqarsinnaasarlutik, peqatigitillugulu taamatut angalariaaseq timmisartumik angalanermit akikinnerulluni. Suliassami matumani umiarsuup eqqarsaatigineqartup angissusissaa eqqarsaatigineqaqqissaartariaqarpoq – immikkut sinersortaammik ilaasartaammik umiarsualiissagaanni taanna Sarfaq Ittutut angitigisariaqanngilaq, peqataassallunili qavannga Nanortalimmiit avunga Upernavimmut sinersorluni angalasinnaalernissamut, nunatsinni inuit ugartugaannut kissaatigisaannullu naapertuunnerusumik.

Ullumikkut sinersortaammik angalanissamut periarfissaqannginnerani inuit amerlavallaat umiatsiaaqqanik angalasarnerat ungasinnerusoq isigalugu attanneqarsinnaanngilaq. Tamanna isumannanngippallaarpoq, taamaattumillu piffissanngorluni uagutsinnit naalakkersuinermit sulialinnit aqqiisutissamik siunniussinissarput timmisartukkut angallannermit akikinnerusumik.



Minnerunngitsumik nunatta kujataani illoqarfiit nunaqarfiillu akornanni umiatsiaaqqanik angallanneq angallannerup tamarmiusup ilarujussuaraa. Tamanna aamma Qeqertarsuup Tunuanut atuuppoq. Nalunngilarput mittarfiliortiternissanut pilersaarut nutaat naammassippata, tamanna angallaseriaat-simik tamarmiusumik pitsaanerulersitsisinnajumaartoq, timmisartut aallartartut amerlinissaat nerinarluni. Tamannali tunngaviusumik ajornartorsiummik aaqqiinaviangilaq – tassami mittarfiliortiteraluaruttaluunniit imaatigut angalaneq timmisartumit angalanermit akikinnerujuassaaq. Aamma puigussanngilarput illoqarfiit anginerusut tassaammata nutaanik mittarfiliorfigissallugit pilersaarutigineqartut.

Nutaanik mittarfittaaruttaluunniit timmisartukkut angalanerit pineqartut inuiaqatigiinni innuttaasorpassuarnut suli akiuallaartussaapput. Taamaattumik sumiiffinni pisariaqartitsinerpaani immikkut sinersortaammik ilaasartaammik umiarsualiisoqarnissaa ujartorparput. Tamanna aamma Upernavimmut nunaqarfiinullu atuuppoq. Ilaasartaammillu umiarsualiissagutta taanna Sarfaq Ittuttut angitigisariaqanngilaq.

Pisortanut aningaasatigut allaffissornikkullu kingunerisassai

Naalakkersuisut § 37 naapertorlugu apeqqutinnut¹ akissutiminni ilisimatitsissutigaaq sinersortaatinut ilaasunik angallassissutinut akimik ilisimatitsissuteqarnissaaq ajornartoq, tamatumani apeqqutaammamat umiarsuarmut nutaamut suut piumasaqaatigineqassanersut. Angallanneq pillugu Isumalioqatigiissitap nassuiaataani ”Qaqortumiit Ilulissanut sineriak sinerlugu ilaasunik imaatigut angallassineq”-mi 2010-meersumi sinersortaatip nutaap 250 millioner kr.-inik akeqarnissaa naatsorsuutigineqarpoq, peqatigitillugulu ingerlatsinermut aningaasartuutit, sulisoqarnermut aningaasartuutit umiarsuullu nalingata sinnera ilanngullugit, 57,7 millioner kr.-iunissaat² naatsorsuutigineqarluni.

Pisortanut aningaasatigut allaffissornikkullu kingunerisassai

Soqanngilaq.

Innuttaasunut aningaasatigut allaffissornikkullu kingunerisassai

Soqanngilaq.

¹ § 37, apeqqut 2019/34

² Angallanneq pillugu Isumalioqatigiissitaq ”Qaqortumiit Ilulissanut sineriak sinerlugu ilaasunik imaatigut angallassineq” qupp. 15.